

Diferente estudionan ta muestra e consecuencianan cu All-Inclusive por tin si no tin control

E fenomeno di All-Inclusive ta un tendencia mundial. Varios destinacion a conoce hopi consecuencianan negativo pa falta di un vision y purba frena e fenomeno prome cu ta laat. Tin varios articulonan cu a keda publica cu e consecuencianan cu por tin di crecemento di inventario di All-Inclusive sin control.

Den un otro articulo di Tourism Concern ta papia di un cantidad di estudionan cu ta muestra e consecuencianan.

Hopi di e agencianan di biahe cu ta bende plannan vacacional ta prefera di bende nan paketenan cu ta inclui acomodacionnan All-Inclusive. Pero kico e crecemento di e fenomeno di modelo All-Inclusive, unda e turista ta practicamente wordo invita pa “laga nan carter na cas”, ta nifica pa e pais cu ta e destinacion.

Segun e articulo di Tourism Concern, na Majorica ta culpa e fenomeno di All-inclusive di ta motibo cu hopi negoshinan local a cera nan porta. Den september 2011, negoshinan local a organisa un protesta nacional contra acomodacionnan All-Inclusive.

Na Turkia un investigacion a conclui cu 10% di locual e turista, cu ta keda na un acomodacion All-Inclusive, ta gasta na su plan vacacional ta logra keda den e economia di e pais, esaki sin a pasa directamente via e negoshinan local.

Na Mombasa, Kenya, “World Bank” a declara cu All-Inclusive ta e negoshi cu menos ta beneficia e economia di Kenya. 87% di e turistanan cu ta bishita Kenya ta scoge pa keda na un All-Inclusive, y net un poco mas cu mita di e habitantenan ta biba cu menos cu \$1 pa dia.

Na Jamaica, hotelnan All-Inclusive a atrae turistanan a termino corto pero a blokia desarojo di otro tiponan di turista.

Na Republica Dominicana, All-Inclusive ta wordo culpa pa percura cu restaurantnan local a cera y un crecemento di un actitud negativo pa cu turistanan.

Y na Goa, India, taxinan local y tour busnan a perde negoshi pa motibo di e fenomeno di All-Inclusive.

Esaki ta algun di e diferente estudionan haci pa cu e efectonan cu e fenomeno di All-Inclusive tin riba paisnan cu a pone cu e. o. Tourism Concern a dicidi di lanta un campaña di conscientisacion.

Cu argumentonan simpel e articulo ta ilustra e efectonan negativo di All-Inclusive manera e. o. riba aspectonan laboral.

Den un rapport conduci pa Tourism Concern tin como conclusion cu hotelnan All-Inclusive no ta reconoce nan empleadonan nan derecho di representacion sindical, hopi di e empleadonan tin falta di entrenamiento, nan ta wordo presiona pa traha un cantidad halto di overtime sin ricibi e pago debido y esaki sin tin un salario adecuado.

Adicional, e entrada cu lo por compensa cual ta tips pa e empleadonan ta menos den e tipo di hotelnan aki mirando cu e turistanan no ta biaha cu mucho placa pa gasta y como consecuencia ta traduci den reduccion substancial den e entrada salarial di e empleadonan. Tourism Concern a ricibi hopi rapportnan expresando rabia y frustracion di gobernantenan y di asociacion di hotelnan di Turkia describiendo



con nan ta wordo presiona di agencianan di biahe di UK pa transforma nan hotelnan den acomodacionnan tipo All-Inclusive.

Otro negoshinan local, manera restaurantnan, taxi tur ta perde cu e modelo di All-Inclusive mirando cu ta trata aki di turistanan cu no ta sali for di hotel.

Na algun destinacion negoshinan a haya nan forsa di cera y tin como consecuencia cu turistanan mester depende di paketenan di cama y desayuno mirando cu tin menos alternativa cada biaha.

Comerciantenan di e. o. Spaña, Cyprus, Kenya, St. Lucia y Jamaica tur ta keha di no por mantene nan negoshi habri pa mucho tempo mas mirando cu e cantidad cu ta sali for di e hotel ta asina minimo.

Turismo actualmente ta e unico pilar economico di nos isla ilustrando e dependencia halto cu nos tin rib’e industria aki. Locual Gobierno di Aruba kier haci ta mantene un balansa saludabel cu a bin ta beneficia nos te cu awor y a proba di ta exitoso.

Mirando e ehempelnan aki unda diferente estudionan ta muestra e consecuencianan cu All-Inclusive por tin si no tin control, mester percura pa bienestar di nos isla y nos hendenan prevalece.